



Selasa, 10 Mei 2022

Ogen: Esekiel 36:1-15



Ipajekenna Mulihi



Nande Lencang sekalak diaken i bas Gereja. Nuri-nuri ia man serayan sideban maka kenca ia ngaloken jadi serayan Tuhan, seh kal beratna perbeben i bas geluhna. Piga-piga bulan kenca itangkuhken, narasna sakit mekelek. Ia arus pindah ku kota gelah perbulangenna banci ertambar. Anak-anak i kuta arus itadingken, guna sekolak ras ngenen juma. Maka lit penungkunenna, *'bage kin suina adi ngikut-ngikut Dibata?'*

Penungkunen enda jadi perenungen si mbages, payo kin kiniseran, pinakit ras perbeben si jadi upahta ngikut Tuhan e. Si idah pe Job, bage ka. Bas ogenta i bas kitab Ezeiel e siidah bangsa Israel selaku bangsa Tuhan pe medungu kel nge kecibalna. Lanai lit si man agahenken i bas ia, tanehna nggo irebut kalak. Dolatna pe lanai lit sabap nggo jadi tokoh-tokohen kalak. Terlepas arah dosa nge maka e jadi man bangsa Israel, kinata maka geluh bangsa e tuhu-tuhu terpuruk mabai kalak si ngidah ngidah rukur, man kai erkiniteken adina mesui nari atena. Tentu perkatan si bage pe melala nge si begi. Tuhan la ngadi terjeng mereken ukumen man kalak Israel erkiteken dosa si ibahanna. Tuhan erpadan majekken Israel mulihi, mereken kedolaten ras keamanan nggeluh.

Aminna gia mbue perbeben si jadi man bangsa Tuhan, Tuhan e perkuah ras melias kap. Bas perdalinen geluhta la kin banci lang lit perbeben guna pemurnian iman ras pengasahen kinitekenta. Bagi tempa iruntuhken kerina kai si erbahansa kita meherga, tapi janji Tuhan kenca kita ngenanami perbeben si kentisik e, sialoken me penebusen ras pemulihen bas Tuhan nari. Desken rumah si enggo iruntuhken, ipajekkenNa ka nge denggo mulihi, terganjangen, tersikapen ras terulin asangken si ngasup kita ngukurisa. Baginta bas sie, tetap megenggeng dengen paguh. Ia si mereken kuasa guna ngeruntuhken, i teruh kuasaNa ka nge kita ipeke mulihi jadi tinepa si mbaru.